

2005 - Skiweekend - Flumserberge

s'Schneeflöckli, dä Sunneschii, s'Sternli und d'Chappe gönd go Schi fahre.....

Es isch Samschtigmorge früeh, s'Sternli, s'Schneeflöckli, dä Sunneschii und d'Chappe treffed sich in Uznach a dä Sägestross und wänd go Schi fahre.

Do seit dä Sunneschii zum Schneeflöckli: "Du Schneeflöckli, ich glaube, dich nämet mir nöd mit, mir wänd nur bi schönem Wetter go Schi fahre!"

Schneeflöckli: "Ich wött aber au mit cho, damit ihr bi dä Stürz echli weicher landet und nöd grad Sternli gsehnd!"

Sunneschii: "Nei, nei, und du bliibsch dähei!"

Und drum hätt dänn s'Schneeflöckli müesse dähei bliibe und alli händ dä Plausch gha. Miteme Kafi gstärkt isch es dänn los gange und dä Sunneschii hät alles ghä. Wo mir dänn a dä Talstation acho sind, isch es zimli chüel gsi.

d'Chappe: "uiuiui, hüt han ich glaub vill Arbeit, das isch jo mir fascht z'chalt."

dä Sunneschii: "Tue jetzt nöd eso memmehaft, es hät soooooooooooooooooo viel Neuschnee, nöd vill Lüüt und ich bi au dä ganz Tag do."

Bevor's dänn aber mit Sack und Pack i dä Gondle los gange isch, händ sich die meischte zerscht miteme guete Kafi müesse ufwärme, will - es isch fascht nöd zum glaube - doch tatsächlich gwüssi Lüüt d'Schiischueh vergesse händ!

dä Sunneschii: "Du Chappe, häsch du das gseh, mer got anes Schiweekend und vergisst d'Hälfti! Isch öppe sglich, wie wenn dä Rüter s'Ross vergisst uf Concour, hoffentlich chunt dänn das nur guet die Saison."

Endlich isch es dänn los gange, alli Schi- (und Snowboard-) Verruckte händ s'Gepäck im Hotel verstaut und agfange, d'Pishte unsicher mache.

d'Chappe: "He he, nöd so schnell, es hät no meh Lüüt uf dä Pischte!"

Aber mer hät keis Pardon kennt und isch gfahre, bis es Hunger ghä hät. Uuuuh, händ die Chässchnitte, d'Chnolibrot und dä Kafi guet gschmöckt, mer hät fascht nüme welle höre!

dä Sunneschii: "Jetzt sitzed ihr scho fascht 3 Stund i dä Beiz, sind ihr eigentlich do ane cho zum Schifahre oder was?"

d'Chappe: "Du Sunneschii, mir isch es eigentlich no wurscht, do ine isch es so schön warm und gmüetlich....."

Irgendwänn hät mer dänn mit dä zahlte Tagescharte doch Mitleid gha und mer hät s'Züüg packt und isch wiiters gfahre bis zum nöchschte agschribne Huus..... Ohweia, und dänn isch es no vill gmüetlicher und wärmer gsi !!

dä Sunneschii: "Ich säg jetzt tschüss, wünsch eu vill Spass bim Schlittle und vergesset nöd die letscht Gondle am Füüfi....."

Oje, d'Chappe hät mer zwar a gha, aber d'Gondle isch leider scho abgfahre, so es Pech! Zum Glück händ d'Manne echli Charme spiele loo, und d'Bergbahn isch extra für üüs numol gfahre.

d'Chappe: "Danke für dini Bemühige, Marcel !"

s'Sternli: "Wer nöd schlittelfescht isch, söll's gschiefer loo.... zäck, pumm, päng, aua, Hilfe..... es isch ja nöd zum Zueluege und Zuelose gsi....hoffentlich chönts dänn besser riite als schlittle!"

dä Sunneschii: "Uuufstoh, es isch morge am Ahti und ich bi au scho wieder do!"

d'Chappe: "Ich muess glaub' hüt au wieder Schütze Hilf leichte, es isch ä cheibe Chälti verusse!"

Die "Nöd-Invalide" händ sich wieder uf d'Pischte gwagt und händ alles ghä, bi dä Akku leer isch gsi. S'Schneeflöckli isch au hüt mucksmülistill gsi und hät sich hüt au nöd gemeldet.

Dafür dä Sunneschii: "Hoffentlich verbrenned ihr eu dä Grind, wenn ihr so fuul und tatenlos uf dä Liegestüehl umeligget."

Mit Sack und Pack isch es dänn am früehner Obig wieder heiwärts gange.

Dä Sunneschii: "Vergesset dänn nöd, euri gmietete Schi und Schischueh wieder abzgäh...."

S'Schneeflöckli, dä Sunneschii, s'Sternli und d'Chappe händ sich dänn erscht am nöchste Tag wieder troffe, händ aber müesse sägä:

"Das isch än absoluts megagigasupertolls Schiweekend gsi, danke vill mol dä Organisatore und guete Besserig dä Halblebige.....!"

Gabi Hofstetter